

MATRI

Junta a lu capulinea di la vita
stanca d'affanni ti firmasti 'n-pocu
e cu lu sangu di la to firita
santificasti ssu gran tintu locu.
Comu na foggia sicca e dipirita,
svampannu di duluri comu focu,
jittata nta ddu funnu di spitali
tu mi dicivi ca nun stavi mali!

“t'accarizzavu li capiddi bianchi...
matri, matruzza mia quantu mi manchi!”

Ju t'assistivi nta lu to Carvariu,
cu sti me' occhi sempi supra a tia,
la virità vutavi a lu cuntrariu,
ma quannu ca caristi 'n agunìa
vitti la sorti chiudiri 'u sipariu,
vitti la morti chianciri cu mia!
Ristai comu mpitratu nta dda stanza
finu ca mòrsi l'urtima spiranza!

“e ti vasavu li capiddi bianchi...
matri, matruzza mia quantu mi manchi!”

Mòrsi me matri e nun mi pari veru,
ancòra ju nun sugnu rassignatu,

la vaju a trovu a lu cimiteru
e pregu a la so tomba addinucchiatu.
E mentri pregu pensu a lu misteru
ca vita e morti... tuttu è destinatu!
A pìcca a pìcca ritorna la firi...
nta lu ritratu me matruzza riri!

“comu su’ beddi ssi capiddi bianchi...
matri, matruzza mia quantu mi manchi!”

MA NUDDU, NUDDU MI SENTI?

Chiamu a gran vuci
e stu gridu-ventu
si perdi nta stu
silenziu scunfinatu!
Vidu, cu st'occhi
vagnati di lacrimi,
ca si grapi lu celu
e grannuli di stiddi,
comu lacrimi piatùsi,
càrinu sbiddiannu
supra sta terra ngrata!
Aspettu, comu 'n-aceddu
cu l'ali vagnati, lu sulì;
lu sulì nfucatu
ca mi quadia stu cori
e scòtula st'ùmmiri
addabbàna lu munnu!
Vogghiu na manu amica
ca mi leva stu scantu,
stu pisu ravusu ca mi scarpisa
e mi fa mòriri ncagghiatu
sutta li me' stissi pinseri
nzuppilu nzuppilu...
Ma stu jornu-seculu
ca firmau lu sulì
nun passa, nun passa chiù...

E ju, pittatu ccà,
ntô quattru di lu tempu,
appizzatu cu 'n-chiovu
nta 'n-muru di ricordi,
talìu, cu l'occhi sbarrachiati,
st'Omini-furmiculi ntenti
a scannarisi ntra d'iddi
e jiettu vuci...
Ma nuddu, nuddu mi senti?

NOTTI DI BUNAZZA

Stanotti ogni stidda
è un chiovu ca sfunna lu celù.
E ju, comu 'n-ummira,
scurdatu nta sta 'gnuni
comu na foggia tremu!
Lu munnu pari fermu
e surdu e mutu...
St'arma mia picchiùsa
suspira piatùsa
sutta lu pisu di stu silenziu
ca sbummica turruri.
No, nun mi sentu cuètu,
anzi mi scantu:
Nun sentu nuddu scrusciu,
nuddu cantu...
Muti li scogghi dormunu
annacati di l'acqua di lu mari
muscia muscia.
Stanotti di bunazza
lu cori mi strazza!
Ammàtula attentu
senza mancu ciatari:
Nun c'è na vava di ventu,
un cocciu di rina scuntentu,
un gridu di petra spaccata,
un corpu di cuda di tunnu

e mancu 'n-lamentu luntanu...
Stanotti na cosa addisiu
e 'un sacciu zoccu...
Aspettu, mpitratu
comu un loccu,
na cosa, ca mi facissi
sèntiri attrappatu
a stu pizzu di munnu!

NUN LASSATILU FORA

Quannu vi pari ca tuttu va stortu
e nun truvati cunfortu,
nun dispirati, facitivi curaggiu;
pinsati ca semu di passaggu
pi 'i strati di st'universu
e cu si ferma è persu!
Nun vi firmati, nun firmativi mai
a cuntari li chiai, li chiai
nsanguniati d"u vostru cori...
Strincìti 'i renti e luttati
contru 'i putenti di sta terra
ca vi vonnu assuggittati
e vi fannu la guerra, na guerra
silinziusa ca l'arma vi spirtusa!
Nun vi firmati, nun vi firmati,
ammulativi l'artigghi e luttati
pi ristari attrappati
ô scogghiu di sta vita!

Quannu vi pari ca v'inni 'u tempu
di jittari vuci, nun vi scantàti,
vuciati, vuciati! Facitivi sèntiri
nta 'i chiazzi e nta 'i strati
unni mazzi di ciuri tistimonianu
l'amuri di l'amici e li parenti

di ddi poviri nnuccenti
ca mòrsiru ammazzati!
Nun vi firmati, caminati sempì drittu,
jittati a la storia lu vostru pitittu
d'amuri, di paci e libirtà!
E quannu vi pari ca 'u munnu
vi sta carennu 'n testa, nun sbattiti
la porta nfacci a la spiranza,
Nun sintitivi sulì, quarcunu vi pensa...
Daticci 'u tempu di scinniri d' 'a cruci,
jìticci ncontru, grapiticci lu cori,
facitilu tràsiri... Nun lassàtilu fora!

NUN MI DICITI CHIÙ...

Nun mi diciti chiù:- gràpiti l'occhi,
talìa la terra, l'arvuli, li ciùri...
Lassàtili cusùti comu sunnu
ca vùdiri nun vogghiu strati strati
linzola ca cummogghianu piatùsi
carni nchiummata sposta a li muschitti...
Megghiu annurvari ca ristari zitti!

Nun mi diciti chiù:-gràpiti l'occhi,
talìa lu celu, la luna, li stiddi...
Lassàtili cusùti comu sunnu
ca vùdiri nun vogghiu 'gnuni 'gnuni
drogati ca si bucanu li vini
circannu arcubaleni culurati
e nveci spìssu trovanu la fini
murennu, senza curpa, scafazzati
comu scarvacchi sutta li tappini.

Nun mi diciti chiù:- gràpiti l'occhi,
talìa lu mari, la rina, li scogghi...
Lassàtili cusùti comu sunnu
ca vùdiri nun vogghiu malantrini,
mafiusi, camurristi e dilynquenti
comu sanguetti sucari lu sangu
di cu' travagghia e suda onestamenti.

No! Noo! Nooo!
Nun mi diciti chiù:- gràpiti l'occhi:
Lassàtili cusùti comu sunnu
ca vidi nùn vogghiu addinucchiati
fidi, giustizia, paci e libirtati.
Vidiri nùn vogghiu chiù omini-servi
sutta 'n-altaru addubbatu di spini
prigari 'n-boja senza umanitati!

MA QUALI OMERTÀ?

Nui nun semu surdi...

Ma quannu ca sintemu certi botti
lu cori n'addiventa na nucidda
e ni tappamu l'oricchi cu li manu!

Nui nun semu orvi...

Ma quannu ca videmu certi lampi
pinzamu a ddu nnuccenti ca cadù
e ni tappamu l'occhi cu li manu!

Nui nun semu muti...

E quannu veni l'ura di parrari
dicemu pani pani, vinu vinu,
nun ni tappamu la vucca cu li manu!

O MAZARISI...

O Mazarisi, siddu m'ascutati
vi vogghiu diri sulu na cusuzza:
lassàvi lu me cori strati strati
e mi mmarcavi supra sta varcuzza.

Siddu jennu passiannu lu ncuntrati
faciticci curaggiu e si vi truzza
faciti finta ca vi veni frati:
Persi lu sensu pi la so Santuzza.

E si pi casu s'iti schiffarati
nàutru favureddu v'addumannu,
ma si pritennu troppu pirdunati:

Siddu viditi ca va lagrimannu,
s'aviti un fazzulettu l'asciucati...
Ju vegnu pi Natali o Capu d'annu.

PETRA-LAVA

Davanti stu cimiteru
di nivura petra-lava
restu allucutu,
e ntantu ascutu
nzem'a ngustii, sospiri
e rèpiti luntani,
l'ecu di canti bisbigghiati;
canti d'un tempu senza età
c'addùmanu vampi di pietà.
Appìsu a lu cavigghiuni
di lu tempu,
lu munti capricciusu
sutta-'n-linzolu jancu
pari ca si riposa
comu 'n-vecchiu stancu.
E cu la varca di la fantasia
navigu nta 'n-mari di memoria
senza bussula e timuni,
cuvannu cinniri di storia.
Mmaginannu la 'ranni vucca
ca vumitau sti petri,
li catanisi 'n chiantu
circari lu riparu a ssa ruvina...!

Ntantu, fantasimi d'omini cunsunti,
ùmmiri di facci canusciuti,
figghi di sta Sicilia comu mia
mi tennu cumpagnia.
Lentu scinni lu scuru
supra sta petra-lava
e lu silenziu, cu tuttu lu so pisu,
sentu pusari supra li me spaddi;
mentri 'n-ventu di stiddi
e 'n-luntanu cantu di cicali,
assicùtanu cu na zuttata forti
li nivuru cavaddu di la morti!

PIRCHÌ SUGNU PUETA...

Pueta 'un s'addiventa,
pueta si nasci.
E ju sugnu pueta
pirchì lu me cori si pasci
e gori e s'alleta
quannu sboccia un ciùri
e mi proj amurusu
li soi pampini odurusi.
Pirchì sacciu capiri ca pi mia
si vesti e si spoghgia,
e ssu gestu d'amuri
è ossiginu ca mi teni 'n vita.

Sugnu pueta
pirchì c'u cantu d'u cori
accumpagnu lu sulitariu
cantu di 'n-aceddu.

Pirchì stennu tappiti
d'amurusanza e di paci
nte strati di stu munnu.
Pirchì mi saziu di suli
quannu mi veni ncontru
ogni jornu pi dirimi
ca sugnu cu 'i vivi.

Sugnu pueta
pirchì sacciu sunnari
timogni di nivi

'n menzu diserti nfucati,
pirchè sacciu abbrazzari
cu l'amuri d'un frati
la genti ca soffri
d'ogni razza e culuri.
Pirchè sacciu capiri
ca tutti ssi fazzuletti
assuppati di lacrimi
sunnù banneri di luci
chiantati nte strati
di stu munnu scurusu.

Sugnu pueta
pirchè sacciu mòriri
e rinasciri ogni jornu
comu lu sulì.
Pirchè, comu lu sulì,
fazzu lustru a tutti
e 'un appartegnu a nuddu.
Pirchè mi sentu nicu e libiru
e a st'arma amurusa
basta e suverchia
na foggia odurusa,
un còcciu di stidda
e 'n-agnuni di celu!

PIRCHÌ SCRIVU...

Quarcunu m'addumanna pirchè scrivu
e unni pigghiu tutti sti tisoni...
però mi trova di risposta privu
e lassu ca rispunni lu me cori.
Ju mancu sacciu siddu sugnu vivu:
è iddu ca mi detta sti palori,
iddu è la fonti di stu sintimentu,
ju mettu 'n carta sulu zoccu sentu!

Sugnu cunsidiratu un gran pueta,
ma ju mi sentu sulu 'n-scribacchinu;
nicu, gnuranti, quasi analfabeta,
mbriacu, senza viviri mai vinu!
E' iddu ca smània e si scueta,
è iddu ca mi nsigna lu caminu;
iddu ca teni svigghia la me menti,
iddu è pueta, ju nun cuntunenti!

Pi scriviri na simplici canzuna,
mi teni notti e jornu a la campìa,
si sugnu stancu mancu si n'adduna!
E quannu ca ci pisca la fuddia,
supra li stiddi e supra di la luna
mi fa vulari cu la fantasia...
si quarchi vota provu a prutistari:
nun vi lu cuntunenti zoccu mi fa fari!

Quali pueta? 'N-simplici scrivanu!
Chiddu ca detta, scrivu, chissu fazzu,
ci prestu la me menti e la me manu:
sugnu 'u strumentu di stu cori pazzu!
Quannu mi detta versi 'n sicilianu,
spissu tistù e siddu mi mmarazzu:
apriti celu! Nun mi duna abbentu
e guai siddu sbagghiu quarchi accentu!

A cu mi criri dottu e littiratu
e si nnamura di la me valìa,
ju dicu ca 'un è chissu lu me statu,
pirchè nun è la me sta puisia.
Nfatti pi fari 'n-semplici dittatu
certu ca nun ci voli maistria...
pi chissu ju pueta 'un mi ci sentu:
è lu me cori c'havi ssu talentu!

Perciò, amicu meu, tuttu ssu vantù
daccillu a lu me cori, pi favuri,
ora lu sai ca quannu ju cantu
nun sugnu nenti chiù chi dicituri.
Dumanna ad iddu si ci teni tantu,
iddu è la fonti di lu me valuri,
pirchè sti versi e sti me' palori
li trovu nfunnu nfunnu a lu me cori!